

Polokalame Fatufatu Meafou mo nā Komiuniti: Takiala mo nā tino talohaga fehoahoani

Ko te Polokalame Fatufatu Meafou mo nā Komiuniti (Creative Community Scheme), ko he faiga paaga i te vā o te Creative New Zealand [te mataēke mo te atiakega o nā mea taulima ma tau aganuku (arts)] ma nā tāupulega pitonuku (local councils) i Niu Hila. E pulepule lava e te tāupulega pitonuku te polokalame i loto o tona lava pitonuku. Ko te kautū o te polokalame, ko te mafai ke fai lava e nā tino o te pitonuku nā tonu. Ko nā tuhi talohaga e kikila ma fuafua lava e he komiti, kua ia te ki lātou te iloa ma te tomai e uiga ki nā tūlaga tau ki nā meataulima ma tau aganuku, i loto o te pitonuku lava o ki lātou.

Ko te māfuaga na fakavae ai te Polokalame

Ko te Polokalame Fatufatu Meafou mo nā Komiuniti, e lagolago ma fakamākeke atu ki nā komiuniti i Niu Hila kātoa, ke fatufatu ma kavatu ni avanoa kehekehe ke mafai ai ke auai ki ei ia tagata o nā pitonuku ki ni fakatinoga o nā meataulima ma tau aganuku.

I lalo o te polokalame tenei, ko nā “meataulima ma tau aganuku” e fakamatala veia “ko nā itukāiga fakatinoga uma e i ei ni fakamatalaga e mātau ki ei”.

Ko ai te mafai ke talohaga ki ei

E mafai he tino tautahi pe he fakalāpotoopotoga ke fai hana tuhi talohaga.

Ko nā tino tau tokatahi e fai ni tuhi talohaga, e tatau ko he tino hitiheni Niu Hila pe he tino kua nofo tūmau.

Kafai na maua muamua e koe he fakatupega i lalo o te Polokalame Fatufatu Meafou mo nā Komiuniti, mo koe lava tau tokatahi pe mo he vāega (group) ei loto ai koe, e tatau ke fai muamua e koe he lipoti o te polokalame na fai muamua, oi fatoā mafai ai ke talia he tuhi talohaga fou mai ia te koe.

Tauiagia: E avanoa nei he fakatupega mo taku polokalame?

Ko tau polokalame e tatau ke –

- » aofia ai ni he vāega o meataulima ma tau aganuku pe e fakatatau tonu foki ki te fatufatuga o ni meafou tau aganuku
- » e fakamaliegia he manakoga e fokotahi pe hili atu o nā manakoga e tolu mo nā fakatupega (*kikila ki lalo*)
- » uma te fakatinoga i loto o te 12 mähina mai te taimi e talia ai te fakatupega
- » manuia ai ia tagata o te komiuniti e iei koe
- » fakatino i loto o te kakai pe ko te itūmālō na fai ki ei te talohaga, pe, e manuia ai foki ia tagata o te komiuniti ei loto o te itūmālō tēnā
- » **nahe** kāmatagia ka ko heki taliagia te fakatupega
- » **heki** maua muamua he fakatupega mai te fakatupega tauvā a te Creative New Zealand mo te polokalame lava e tahi
- » **heki** maua muamua he fakatupega e ala i nā fakatupega a te Creative New Zealand mo nā polokalame e hili atu i te taki tauhaga e fakatino ai.

Manakoga mo nā fakatupega

Ko tau polokalame e tatau ke fakamaliegia he manakoga e fokotahi pe hili atu o nā manakoga iēnei mo nā fakatupega –

- » **Auai ki ei ia tagata o te komiuniti** – Ko te polokalame ka maua ai ni avanoa mo nā tino i te komiuniti e iei koe ke fakatalanoa ma auai ai ki ni fakatinoga o ni meataulima ma mea tau te aganuku.
- » **Mau itūkāiga** – Ko te polokalame e ia lagolagoa te mau itūkāiga o tū ma aga ma meataulima ma tau te aganuku, e fakailoa ai te e iloga o te kehe o ki lātou, ma te mau itūkāigā aganuku.
- » **Tupulaga** – Ko te polokalame ka mafai ai ke fakamālohi ki te tupulaga (i lalo o te 18 tauhaga) ke auai ki nā fakatinoga o te māmamalama tau ki te aganuku.

Nā itūkāiga polokalame e ono mafai ke fakatupe e aofia ai –

- » fakaalialiga, ata pe ni pehe puke (productions), koneheti, fakafiafiaga, akoakoga (workshops) ma ni fakatinoga o ni meataulima ma tau te aganuku, e maua ai ni avanoa mo tagata ke auai ai ki ei
- » ni polokalame e lagolago ai nā tū ma aga ma nā meataulima ma tau te aganuku a tagatā nuku kehekehe
- » polokalame meataulima ma tau te aganuku mo te tupulaga
- » polokalame e takitakia e tufuga i nā meataulima ma tau te aganuku, ma e fakatahi ki ei ia tagata o te komiuniti tēnā
- » nā mea e fakaaogā (materials) mo fakatinoga o te polokalame
- » tupe fano a koe e totoi fakafokotahi, mo nā polokalame e he mataloa te taimi e fakatino ai
- » fakailoaga ma te fakahalalauga o te polokalame ke iloa e tagata.

Itūkāiga polokalame pe ni fakatinoga e hē mafai ke fakatupe e aofia ai –

- » fakatinoga e hē fakahino tonu ki nā meataulima ma tau te aganuku
- » fakatinoga e pule tonu ki ei nā ākoga pe ko iētahi fakalāpotopotoga tau akoakoga
- » totoi faifai pea mo nā mea tau pulepulega (administration) e hēai he hokotaga ki he polokalame maoti
- » nā polokalame mautū a he fakalāpotopotoga pe he tautuaga
- » tau o nā polokalame kua uma te fai (polokalame kua kāmata pe kua uma)
- » tau o te meakai mo he mea e fai
- » hakiligā tupe
- » fauga o ni mea, e ve ko he fale fai mea taulima ma fai ai nā fakaalialiga ma ni ona mōli, kie pupuni, pe ko te toe fakafougia o te fale
- » fakatau mai ai ni meatōtino e vē ko nā komipiuta, mea pukeata pe ni mea fai mūhika.